

四庫全書

集部

欽定四庫全書

集部

攻媿集卷一

詳校官右中允_臣薩敏

總校官庶吉士_臣倉聖脉

校對官中書_臣牛稔文

謄錄監生_臣袁繼升

欽定四庫全書

集部四

攻媿集

別集類三 宋

提要

臣等謹案攻媿集一百一十二卷宋樓鑰撰
鑰有范文正年譜已著錄其集載於諸家書
目者或作百卷或作八十五卷而世所傳鈔
本有僅存四十二卷者蓋流傳既久多所佚
脫此本原作一百二十卷與宋史藝文志及

陳振孫書錄解題所載相同猶為舊帙惟中
缺第七十七卷據原目為宣王內修政事光
武大度同高祖二賦玉卮為壽宅道炳星緯
二詩用人安民治兵三策又缺第七十八卷
據原目為御試進士舉人台試館職閣職省
試別試解試上舍州學諸試所擬策問十五
篇又缺第七十九卷據原目為宴會慶賀致
語十五篇上梁文四篇勸農文二篇其第七

十三卷據原目缺跋王伯奮所藏文苑英華
跋清閼居士臨修禊序二篇第七十四卷據
原目缺跋劉元城江諫議任諫議鄒道鄉陳
了齋五諫帖一篇而第五十六卷中揚州平
山堂記亦缺其後半諸家所藏刻本鈔本並
同今俱無從校補至第四十八卷第八十卷
第八十一卷第八十二卷有青詞朱表齋文
疏文之類凡一百六十七篇均非文章之正

軌謹稟承

聖訓驟從刪削重編為一百一十二卷用聚珍版
摹印以廣其傳鑰居官持正有守而學問賅
博文章淹雅尤多為世所傳述本傳稱其代
言坦明得制誥體葉紹翁四朝聞見錄載鑰
草光宗內禪制詞有雖喪紀自行於宮中而
禮文難示于天下二語為海內所稱此言其
工於內外制也本傳又稱鑰試南宮以犯諱

請旨冠末等授贅諸公胡銓稱為翰林才今
集中謝省闈主文啓一首即是時所作此言
其工于啓劄也王應麟困學紀聞取其門前
莫約頻來客坐上同觀未見書二句載入評
詩類中此言其工於聲偶也而袁桷延祐四
明志稱其于中原師友傳授悉窮淵奧經訓
小學精据可傳信尤能盡鑰之實蓋宋自南
渡而後士大夫多求勝于空言而不甚究心

於實學鑰獨綜貫今古折衷攷校凡所論辨
悉能洞澈源流可謂有本之文不同浮議王
士禎居易錄稱其行盡松杉三十里看來樓
閣幾由旬一百五日麥秋冷二十四番花信
風水真綠淨不可唾魚若空行無所依諸句
而病是集多叢冗謂表狀內外制之類刪去
半部亦可然貪多務博即誠齋劍南平園諸
集亦然蓋一時之風氣不必以是為鑰病也

至於題跋諸篇尤多原原本本證據分明不止於居易錄所稱三笑圖贊吳彩鸞玉篇鈔唐昭宗賜禧寶勅書三篇毛晉輯津逮秘書摘錄宋人題跋共為一集而獨不及鑰其偶未見此書歟乾隆四十六年六月恭校上

總纂官臣紀昀臣陸錫熊臣孫士毅

總校官臣陸費墀

提要

攻媿集原序

鄧山參政樓公攻媿先生文集一百二十卷建安真德秀伏讀而嘆曰嗚呼此可以觀公立朝事君之大節矣蓋公之文如三辰五星森立天漢昭昭乎可觀而不可窮如泰華喬嶽蓄泄雲雨巖巖乎莫測其巔際如九江百川波瀾蕩潏淵淵乎不見其涯涘人徒覩英華發外之盛而不知其本有在也慶元初韓侂冑除知閤門事忠肅彭公力諫改侂冑內祠彭公予郡公在瑣闥極論

之云去者不復侍左右留者召見無時終不能遠時侂
冑之惡未著也既而竊弄國柄以黨論盡錮天下賢士
挑敵棄盟中外騷然天下始服公先見朱文公侍經筵
內批予祠公持其命不下曰當今人望儒宗無出熹之
右者奏雖寢然當邪說充塞之時首倡學者共尊朱公
後卒賴其言而學禁遂開道統有續然則觀公平生大
節而後可以讀公之文矣公生于故家接中朝文雅博
極羣書識古文奇字文脩衆體非如他人窘狹僻澀以

一長名家而又發之以忠孝本之以仁義其大典冊大
議論則世道之消長學術之廢興善類之離合繫焉方
淳熙間鴻碩滿朝每以奏篇出其援據該洽義理條達
者學士大夫讀之必曰樓公之文也一詔令下其詞氣
雄渾筆力雅健者亦必曰樓公之文也嗚呼所謂有本
者如是非耶公既醫侂冑之鋒退居卻掃者十有四年
嘉定初起為內相俄輔大政向來儔輩凋喪略盡而公
歸然獨存遂為一代文宗德秀嘗竊論南渡以來詞人

固多其力量氣魄可與全盛時先賢並驅惟鉅野李公
漢老龍溪汪公彥章及公三人而已念昔校藝南宮自
事東府或清言竟日或極論達旦德秀退而書紳終身
誦之其所以猶爲當世善人君子所興而不遂爲塗人
之歸者公之教也公季子治以集序見命德秀何敢辭
建安真德秀謹序

欽定四庫全書

攻媿集卷一

宋樓鑰撰

古體詩

攻媿齋

余以攻媿名齋俞致翁惠書謂若無媿可攻者
讀之悚然不敢當以謝之

聖賢不得見道散固已久學者多自賢鮮肯事師友顛

冥聲利中悔吝皆自取動言無媿怍未知果然否寡過
云未能先聖欣善誘凜凜孟氏言幾希異禽獸參乎病
知免遂使啟足手寧知起易簣又在此段後吾儕況小
人氣質素凡陋以其所以養孝道亦何有勉前類水馬
立處祇如舊倘復不自立其末當愈謬每思攻所媿扁
勝銘座右三誦故人書慙汗幾欲溜夫豈爲戲言知君
于我厚因之更加警補過尚无咎

謝湖山居士示和陶詩

吳給事弇

淵明千載人風節仰孤峭豈惟辭督郵蓮社不得召書
不求甚解眼高得玄要詩亦本無意但寫胸中妙齊梁
紛衆作嘈雜春禽叫稚子候簷隙文通劇搜紹矯矯玉
局翁尚友謝浮漂飽喫惠州飯追和欲同調湖山老居
士宏才蓋廊廟出入官五紀懷歸自年少屢賡歸來辭
吾行有先兆老龍卧林壑年高德彌劭向來批勅手甘
心事耕釣築室據仙居泉石造深奧亭榭望堂皇蓬萊
對圓嶠涉園日成趣遇客酒頻酌巖巖鸞鶴姿炯炯雙

昨瞭墮體黜聰明坐忘樂遺照西疇時告春東臯快舒
嘯襟期古暗合此事不容詔盡和靖節詩筆走追風驃
又如斐旻劍騰空徑投鞘人生嗜欲深山林不供燒何
當從公游翛然寧荷篠小子敢言詩未免事華影西施
難效顰邯鄲恐貽笑思欲焚舊藁世味輕咀嚼稍尋韋
蘇州旁引孟貞曜絕去翰墨畦毋鑿渾沌竅尚或庶幾
焉未暇期速肖

送袁和叔尉江陰

澄江少日曾經行高城傍有長江橫君山特立江之汀
下瞰淮甸一堂平中港引潮深無聲萬頃灌注滋農耕
戰國今幾二千齡黃歇此地猶垂名舊以邑屬南蘭陵
疲于奔命吏失寧今焉裂地為專城獨當一面行雙旌
井市雖小民厚生四十萬緡輸賦征舶商輻湊衆貨羸
牒訴簡省官曹清一邑負郭相依憑守宰同僚齊弟兄
脈絡貫通易盡情尉職無卑近編氓坐閱是否真權衡
傍郡孔道困將迎我乃靜趣如郊坰安輿並行人子榮

況有海錯供庖烹河臄鮓鮓鮮不鯉車螯蛤蟹均藜藿
夫君傳家有典刑父子知己人一經詩書滿門不慙卿
豈羨漢士董金籛薦口久已徹帝京九萬自此開鵬程
平生寒牕照短檠興亡千古無遁形妙年射策當彤庭
歸領後生為主盟友朋講習誠專精世故多端須飽更
京口直下連滄溟官府濶稀行旅驚邊頭久無夕烽青
要在彈壓潢池兵簿書期會勤經營人物酬應審重輕
一言行之可終身謹毋失已毋失人贈人以言豈吾能

頗嘗于此三折肱舉以送君君試聽

登育王山望海亭

瘦藤挂破山頭雲山溪盡處開危亭平田萬頃際大海
海無所際空冥冥乾端坤倪悉呈露飛帆去鳥無遺形
蓬萊去人似不遠指點水上三山青褰裳濡足恐未免
倘有飈馭吾當乘是中始覺宇宙大眼力雖窮了無礙
雲夢八九不足吞回視塵寰一何隘曾聞芥子納須彌
漫說草菴舍法界看我振衣千仞岡笑把毫端捲烟海

林景思雪巢

四時不皆雪陸居本非巢高人興寄遠表此一把茅吾
非二祖可夜立寒齊腰吾非鳥巢師結廬置樹梢白日
照我心不以見睨消兩腳踏實地風雨無漂搖作詩窮
益工寒瘦逼島郊落筆句驚人不復尋推敲客至不問
誰淡若君子交直氣干霄上不視鄙斗筭富貴頃刻花
疇能等幻泡附離如幕燕自謂漆與膠先生閱世熟兀
坐山城坳春陽會有時豈曰終繫匏錫山寄雄文凜然

豎髮毛我非敢言詩為君聊解嘲

題龍眠畫騎射抱毬戲

綠楊幾枝插平沙柔梢裊裊隨風斜紅綃去地不及尺
錦袍壯士斫髻射橫磨箭鋒滿分靶一箭正截紅綃下
前騎長纓抱繡毬後騎射中如星流繡毬飛硯最難射
十中三四稱為優元豐策士集英殿金門應奉人方倦
日長因過衛士班飛騎如雲人馬健駕幸寶津知有日
窮景馳驅欣縱觀龍眠胸中空萬馬駭目洞心千百變

追圖大槩寫當時至今想象如親見靜中似有叱咤聲
墨淡猶疑錦繡眩閒牕撫卷三太息五紀胡塵暗幾旬
安得士馬有如此長驅為決單于戰

題羅春伯所藏修禊圖序

東遊登會稽祇見蘭亭不見碑北過中山府欲訪此碑不
知處間從故家看墨本如此二者絕難遇曾經耶律氈裏
去至今薊北猶知慕時將一二餽北使持歸往往快先覩
未知玉石真在否要比江南終近古他日縛取呼韓作編

戶勒銘歸來過定武只問君王乞此碑打向人間莫論數
題孟東野聽琴圖因次其韻

誰歟住前溪夜深以琴鳴天高顥氣肅日斜映疎星橡
林助蕭瑟泉聲激琤琤彈者人定佳能使東野聽束帶
不立朝還夜甘空庭龍眠發妙思神交窮杳冥不見彈
琴人畫出琴外聲郊寒凜如對作詩太瘦生恨不從之
遊撫卷空含情

壽安撫伯父

東樓德澤流無窮我公挺生慶所鍾瓊枝玉樹瑩精彩
迴然不墮風塵中少年慷慨吐虹氣文彩元不減儕輩
胸中妙蘊經綸才剴劇裁繁特餘事曾從蓮幕試牛刀
舉城但識劉功曹瀾翻薦口動天聽一語便逾華袞褒
上方欲革嶺南弊東才果得吳刺史不妨一勺飲貪泉
清德泠泠今可紀憑軾雍容安七閩列郡合詞稱得人
從茲十載秉麾節坐令萬里回陽春洞庭風月瀟湘雨
君王無復憂南顧抗章乞得半生閒遥指山家賦歸去

廟堂未肯閒宏才大開東閣需公來朝隨召節赴天闕
夜馳使駟歸長淮廣陵卧治要汲直金節熒煌照熊軾
底用腰纏十萬錢且看身享二千石忽思鱸膾寒菰羹
拂衣欲遂鄉關情視去西陽如脫屣意色蕭然同鬪生
畫船重汎西湖上水光山色都恙恙主人管領東風回
故園桃李倍清爽六鼇背負三山歸輪囷老檜蒼龍姿
了無塵俗敗人意斐几長物皆現奇橫岸綸巾披鶴氅
神情直出羲皇上塵事到頭曾不聞卧聽歌臺傳緩響

百花堂前手自栽興來一杯復一杯人生亦欲自適爾
富貴于我何為哉仲春況屬懸弧旦使君亭榭風光煖
東君豫借一分春不許芳菲作春殿綺羅香深初肆筵
弟兄酬酢盃相傳此時更復借一醉君從何處拌垂蓮
五侯貴盛德未美簪纓不滿高陽里何如清白傳家風
奕世青氈盡朱紫燕居今喜相比隣其如四海須陶鈞
羽書鼎來在朝夕何數羔雁徒成羣芙蓉城中有仙室
十洲三島環其側此中樂不減商山功成歸作茹芝客

送伯舅汪運幹

大雅

人生自古悲別離
別離今日何足悲
試問今日行者誰
鄞江名族真男兒
虬鬚燕頤軀十圍
凜凜端有熊豹姿
毅然剛立不怒威
笑視鼠輩何脂韋
州縣小試囊中錐
政績今在衆口思
姓名通籍黃金閨
便泛王儉紅蓮池
平時幕府多素尸
坐縻公粟邀以嬉
只今方當多事時
正要名士同驅馳
森森百萬虎與貔
荷戈分駐淮東西
兩淮千里雙使麾
幕中僚吏皆耀犀
惟公婉畫明著龜

辯如懸河不可隄胸中武庫深難窺決策固有堂上奇
朔風吹空黃草齊正恐秋高胡馬肥萬人相顧目睽睽
見公此去多腹非公獨襍被行不疑單車西去征馬嘶
平生氣槩衝虹霓恨無尺箠笞羌夷方今天相中興期
黜虜戴頭來邊陲顧公速蹈功名機匈奴不滅何家為
出門千里何足辭但願滿引金屈卮

夜月泛舟姚江

秋暑不可耐幾思泛中川晚來興有適溪船偶及門涼

月纔上弦平湖可黃昏倚楫縱所如卧看龍泉山長虹
跨空濶過之凜生寒坐穩興亦佳夜氣方漫漫草蟲鳴
東西飛鳥相與還仰頭數明星垂手搖碧瀾主客惜此
景不及攜清樽無酒要不惡徜徉足幽歡幽歡有何好
扣舷澹無言

送王正言守永嘉

江頭潮生江月小暝烟綠暗垂楊道有客扁舟送使君
道傍不怕擲揄笑向來一別三換歲正喜親情得傾倒

吏民引領望推麾空有離愁滿懷抱使君讀殘萬卷書
古事今事俱了了便應珥筆侍天陛不然代言登鳳沼
瀛壖山水久寂寥為屈朱輜來坐嘯恰憤峰高舊題咏
赤城所在經行飽永嘉名郡太守尊靈運後來詩絕少
天作雁蕩地為藏蠟屐穿山未曾到改轅卻向箇中去
更得江山助詩好齋鈴靜處定得句不待池塘夢春草
去年海水上平地大風駕浪從天杪蒼生泯泯生魚頭
聚落隨波迹如掃今年二麥連野秀田家扶犂事秔稻

使君憂國眉不開叱馭徑行仍及早哀哉千里方更生
縣官租錢酒力曉縱民自恐上不足誅取何憐下無告
邦儲邦本孰輕重肯使疲民困征擾君不見巖巖千古
陽道州政拙催科自書攷

游龍瑞宮

隔山望危石老面凜如鐵路回兩屏開見此高崿崿偉
哉名公卿莪冠會朝列又如鼓迅霆玄雲助擊烈癡雲
不作雨空翠襲冰雪野水不知源遶徑幾萬折子長真

愛奇萬里探禹穴我家甬水東扁舟輕入越竊此半日
閒到處輒清絕傳聞古洞天瓊臺照金闕神仙杳難問
一笑山石裂相逢客路中翻手數年別勝地更躋扳莫
厭屐齒折

三日不得過都泗堰

南朝何公棲禹穴嘉遯悠然老高潔一朝送人都泗埭
歸歎此途於此絕我亦何為走塵埃數年不記幾往來
船橫三日不得度愧想高風安在哉

宿佛日山

平生臨平山知誦藕花句輕帆幾來往山色澹如故寧
知千萬峯中間著佳趣蕭蕭蒼髯翁為指花城路我來
春正濃天寒日將暮雲深鐘唄鳴自喜得勝具緬懷玉
局仙老筆掃朝霧玉槃儼相持珠旒竟何所惟餘渥注
水蒼龍角牙露人間翻覆手烈日變烟雨俗子眩炎涼
三四錯賦芋道人笑視之萬化隨所寓深坐十笏地一
息了千慮箇中誰得知幽鳥背人去

求仲抑招遊山歸途遇雨

竹輿遶湖濱宿露尚厭浥徑到玉岑下坐久客始集起
穿靈石山萬松介而立梅天氣清潤空翠行可挹古藤
幾百年枝蔓兩山及見說暮春時花紫光熠熠直疑老
潛虬初起夜來蟄俯玩歲寒泉齒冷不敢吸相將上龍
泓塵鞅謝羈勒洞有靈獸居臨深心岌岌魚遊明鏡中
巨浪無三級寒苔載水去萬頃潤原隰濛濛山雨來歸
僕鳥飛急野興殊未已日昃不暇給衝泥上湖船雨陣

遽奔襲飄風將急點回旋驚四入中流益蕩兀短篷不
當笠停篙亦久之怒勢不少戢我徒方嘯歌弗謂改豪
習但苦瓶罍罄莫問衣裳濕

吳江舟中

阿連久已共一被小別愁生夜無寐風帆將我上征途
回首江中日千里小舟橫卧吳江水夢回依約蕭齋裏
五更漏急月黃昏鳥散一聲人未起

讀范吏部三高祠堂記

三高之風天與高三高之靈或可招小山以後無此作
具區笠澤空寥寥幾從垂虹蕩雙槳寓目滄浪獨怡悵
筆端不倒三峽流欲遽招之恐長往前身陶朱今董狐
襟抱磊落吞江湖瑰詞三章妙天下大書深刻江之隅
我來誦詩凜生氣若有人今在江水扁舟獨釣膾鱸魚
茶竈筆牀歸南里先生同是丘壑人只今方迫功與名
謝公捉鼻恐未免便看林藪生風雲他年事業滿彛鼎
乞身歸來坐佳境不嫌俗士三斗塵容我漁蓑理烟艇

仙都獨峯

漢家武徹求神仙方士搯掌多夸言蓬萊隔海不可到
屬車徜徉上喬山傳聞黃帝久仙去胡為有石高巘岼
游談不經理欲屈謾言此地藏衣冠縉雲自是仙窟宅
萬壑千巖比如櫛突然一石摩青雲造化應勞巨靈擘
仙風吹墮碧蓮花玉井半空人不識望之不計幾千尺
八柱擎天此其一伯夷制行高且孤萬世猶能立懦夫
英魂凜凜今不死化作此石山之隅橫斜轍跡依然在

我亦何能窮古初

靈壁道傍怪石

飽聞茲山產奇石東南寶之如尺璧誰知狼籍亂如麻
往往嵌空類鑱刻長安東南萬歲山搜抉珍怪窮人間
汴流一舸載數輩徑上艮嶽增孱顏當時巧匠斲山骨
寘之江干高突兀干戈動地胡塵飛坐使奇材成棄物
君不見黃金橫帶號神運不數臺城拜三品只今零落
荒草中萬古淒涼有遺恨木人漂漂不如土坐閱興亡

知幾許行人沈嘆馬不前石雖不言恐能語

括蒼溪漲

雨餘大溪觸山流氣勢直欲凌沙洲浮梁中分斷蟠螭
流沫東去行蛟虬人家嘈嘈避新漲雲稼冉冉添平疇
漁翁輕生有如此小艇橫絕隨飛鷗

石門洞

扁舟百里遶城回青山中斷立兩崖清都虎豹隱不見
但見閭闔排雲開峯回失喜大飛瀑聲震萬壑驚春雷

掀髯目極九霄外，玉虹千丈飛空來。
一冬青女斲天雪，不知聚此山之隈。
傳聞神龍卧其上，寶藏擊碎真瓊瑰。
胸中先自無塵埃，到此更覺心崔嵬。
天風為我喚空翠，春水瀉入騷人懷。
謫仙曾來寫勝句，劉郎又為開天台。
我慙筆無挽牛力，醉墨滿壁誰為裁。
或言龍湫更奇絕，鴈山高處深雲埋。
我方攜筇往尋訪，未知比比何如哉。

大龍湫

北上太行東禹穴，鴈蕩山中最奇絕。
龍湫一派天下無，

萬衆贊揚同一舌行行路人兩山間踏碎苔痕屐將折
山窮路斷腳力盡始見銀河落雙闕矩羅宴坐看不厭
騷人弄詞困搜抉謝公千載有遺恨李杜復生吟不徹
我遊石門稱勝地未信此湫真卓越一來氣象大不侔
石屏倚天驚鬼設飛泉直自天際來來處益高聲益烈
溟池倒瀉三峽流到此誰能定優劣鴈山佳趣須要領
一日盡游神惡褻驪龍高卧喚不應自愧筆端無電掣
輪囷蕭索湍不怒非霧非煙亦非雪我聞凍雨初霽時

噴擊生風散空濶更期雨後再來看淨洗一生煩惱熱
連雲亭望海中諸山

鴈山本在雲海中波濤千古相撞舂泥沙洗盡見山骨
巖壑所在皆玲瓏是誰一口汲水盡平地卓立成竒峯
至今往往有遺跡相傳渺漭何能窮我乘單車來自東
佳處十數一覽空晚登四十九峯頂曠望巨海烟濛濛
羣山錯立不知幾朝日照耀天霞紅是間瑰竒定多有
鯨波掩蔽深莫通我無太真燃犀法安得一闚馮夷宮

會聞滄海變成陸卻與鴈山爭長雄

寄題張法曹瞻雲軒

張侯名軒意可知如登太行看雲移我雖未得登軒墀
不鄙要我巴人詞爾時膝下遨以嬉欲斷數語語不隨
娛侍東嘉樂無涯官舍偈仄親不怡安輿相將甬水湄
日日東望勞支頤秋風得檄欣星馳歸拜親下聊信眉
官事有程不得違欲去故國行遲遲重來橘柚黃金垂
霜著新蟹雙螯肥海魚甘鮮一尺圍欲奉色養春為期

瞻雲之思今同之慨然落筆成新詩人間至樂在庭闈
何用自縛微官為君方欲解左顧龜我亦日思投檄歸
相望百里俱萊衣從他天外閒雲飛

次韻翁處度同遊北山

兩夫持鎌行我先巧尋徑路其智專我扶枯藤衣短後
意氣已出層峯巔何郎鮑叔鮑經歷勝處一手自編
我攜舊紀訪陳迹止恐急景不得延徜徉共登青雲梯
今日邀我為擊鮮始觀神龜闢青泚上有石壁來飛泉

隱蹟遺基平可坐下顧亂石如磨鋌懸崖雙瀑灑空雪
來自一握孤雲天卻從下流汭深險崎嶇直到青潭邊
朝陽射光破幽閤斷虹上下遮潺湲傳聞高山更高處
雅有行路從西偏同行無乃深好事盃酒自犒腳力全
誅鋤荆棘窮鳥道欲進不得意愈堅旋呼童僕累危石
笑採野菊聊盤旋捫蘿騰身上苔磴往往歡呼爭著鞭
側行危步汗浹背石角或使衣裳褰少焉身在雙瀑上
又見高派衝泓淵自笑泉石成膏盲愛賞不減蟻慕羶

巉巖數峯巧遮護妙處二老初無傳脫迹塵埃到此地
便覺神思飄飄然回首江南塵一聚城郭歷歷眼欲穿
相期更看水流處步履未倦夸輕翩一上千尺窮山椒
碧澗靡迤流蒼烟尋源不能且忘返石猊巍距驚神鐫
退求歸徑惘難問藤蘿所在相縈纏我方踟躕風煙表
披披衣袂身欲仙晚歸招提各痛飲讀盡屋壁長短篇
截筒環山覽清駛竅出珠穗心亦憐棊枰相與論瓜葛
橫琴不妨揮五絃人生易老費扶掖勝具大率須少年

伊余歷聘佳山水愛奇切慕太史遷明年炎暑襲故步
與君共枕清流眠

遊白石巖

我遊仙都觀獨峯轍跡雖在車不通鼎湖望極幾怊悵
悵無羽翮凌天風茲來樂成望白石玉甌突兀摩蒼穹
人言真人老聃裔鑿開洞府遺仙蹤無人共登青雲梯
躋攀伴我惟枯筇縈回約畧三十里踏遍萬疊高隆嵒
斷崖泠泠落殘雨雙石凜凜亭孤松卻從山椒下谷口

石欄屈曲遮碧梭頗疑山高氣凝凜古來積雪今未融
是誰玉斧妙鐫斲仙洞雙闕驚神工巖深白日尚幽閤
別有石竅開天聰傳聞峯頭貯清泚苔罅涓滴聲冬瓏
奮身便與上虛閣海山錯立烟濛濛腳底千山行伏龍
手揮五絃俯冥鴻霜林搖落當玄冬長嘯一覽萬象空
解衣寄宿旦過寮魂夢亦墮冰壺中曉看日出滄海東
蠟炬百萬燒天紅眼高不數鴈蕩雄行田下笑康樂公
未能辟穀追仙翁頗亦有意棲琳宮三山不覺去人遠

安期羨門宜相從
驂鸞駕鶴太多事
但欲御氣游無窮
約諸公再游龍湫

昨暮與君上龍湫
天久不雨無湍流
笑呼拊掌喚不應
悵望頗亦令人愁
夜來雷鼓驚龍起
溪聲已覺亂人耳
莫辭重訪尊者居
坐看倒翻三峽水

送劉仲起主簿

劉郎鸞棲海瀕邑
不減向來人性習
凜然軀幹即之溫
語恐傷人中有立
論交雖厚笑甘醴
御史以嚴無束濕

公餘黃卷頻卷舒藝圃工夫日加葺永嘉數多君子僚
休沐新盟有清集伯倫忽去誰鯨吸欲挽不留情悒悒
君年方盛才有餘逸驥寧容在羈馭期君欲蹈功名機
塞草連雲朔風急

王侍御壽詩

使君威名聞四方南牀凜凜凝秋霜使君和氣到甌越
幕府初開夜飛雪頗聞此雪近歲無定知來隨御史車
黃堂洗印未多日慶朝況此當懸弧明年豐登日可數

父老兒童爭起舞遲明賀版擁譙門試拾歡謠作詩語
使君風度神仙人相門出相寧非真妙齡兩科談笑得
脫趨嚴召依風雲臺端敢言姦聽聳至今讜論時傳誦
踏遍巫山十二峯却尋春草池塘夢人傳使君威稜稜
我知威愛元兼行蒼髯如戟面如鐵惠養自有循良稱
高牙入境紛進謁賓屬庭趨躬磬折民生共喜愛日溫
吏行獨畏春冰裂向來夔州妙籌邊夷蠻落膽皇靈宣
還朝奏課居第一夜半帝席為之前東嘉今為股肱郡

小試望之三輔近會循故事入三公致君要使登堯舜
東風未動春先回梅花照眼歌筵開吏民合詞誦難老
一笑千里傳銀杯佳兒恂恂受衣鉢玉樹芝蘭俱秀發
江南世胄比長淮更看雲來萃簪笏平生知己今上天
敢復作歎寒無氈巴言未足贊公壽載誦峻極崧高篇

鮑清卿病目不赴竹院之集詩寄坐客次韻

鮑侯少年老文學藝苑優游富耕穫胸中涵養自成趣
妙處正恐兒輩覺我慚門巷非尺五字欲問奇誰與推

開樽竹院望同醉遮眼腦脂何太虐圓圖十客踏雨來
相從不負東風約投壺雅歌了無恨祇恨公車一前卻
海棠春深照眼明風物融融悟非昨從教雨洗胭脂淡
小摘何妨供把握夜闌燒燭照何睡靚妝如在結綺閣
牆頭西望爛蜀錦嫣然一笑無聲樂飛紅點地繡作茵
正須席地天為幕要知富貴出天姿艷杏夭桃何足錄
主人小築真好事肯學區區專一壑洞門不鎖要客來
笑君太似羊公鶴雨餘珠淚色慘悽一顧正嫌無伯樂

忽驚新詩來叩門妙語天然不煩琢坐中傳觀字欲漫
我豈降幡甘面縛清明已過雨不休雲霧猶屯四山腳
揩摩病目不應遲及此紅英半零落枝頭尚有未開花
縱已離披亦何惡知君既負西岑遊可使一春終落寞
會須來此共賦之正要重聞誦新作

贈光孝益老

光孝長老師益蘇魏公諸孫兄延壽為台州判
官別四十餘年一見歡甚林吏部有詩次韻

原鵠鴻雁行此理懸諸天萬事可變滅天性難推遷顯
庵幼出家潔飲同玄蟬一鉢寄西東悠悠經幾年外慕
等浮雲百念灰無煙難兄忽相逢觸動歡喜緣光陰信
可惜征袂何翩翩叱胥掩簿領來問妙峰禪刺刺道家
世客淚如迸泉玉堂與黃閣衣鉢親相傳游宦非為貧
不敢替所先老師雖晏坐至情豈唐捐此會非偶爾絕
倒秋風前手持詩卷來謂予得無言曉以天性語人生
要有原嗟哉偽日薄其豈本同根一旦成讐敵釜中急

金方日方全言
卷一
相煎寧知有佳人芳草夢阿連相見無幾時瞥見魚躍
淵固知出世法惜別詎不然又當作大觀勿為愛網牽
千山原不隔毋庸對牀眠

送王道州

九疑之南為舂陵瀟水清駛山為城郡齋正據山直上
一覽萬家無遺形家君頃年入蓮幕我不得往空馳情
先生分符此中去心旌搖颺隨雙旌先生平生飽文學
身上著作承明庭與篇隱帙亦如響一時自許文章鳴

高辭坐奪造化巧凜凜韶濩聲鏗鏘把麾江海非無意
親扶版輿賦南征頗聞楚俗未蘇息糟糠不厭嗟疲氓
正資儒術飭吏事拔去強薤摩孩嬰政成環召事未晚
天子日夜開延英風流千古三刺史往繼輦叟陽先生
毋庸自書追科攷但願寄我春陵行

哭王知幾墓

知幾少也爽萬事談笑了自謂頗寡合見我輒傾倒百
年能幾見一別迹如掃父子俱埋壁嗚呼何其早向來

論文酒和淚傾宿草此意誰復知寤嘆令人老

仲舅尚書生朝

去年生朝燕稽山館舍朗朗屋百間紅裙合樂飲徹旦
坐上衆客皆酡顏今年生朝半歸路竹輿瀟瀟曉衝雨
回頭風景非去年當時賓客今何處仕已喜愠曾何分
適齊未減楚子文鼻間栩栩固自若世情物態徒紛紛
平生知足志閒退歸老鄉關了無悔但欲年年醉西風
坐閱人間百千歲人間萬事日不同尚書人望方顒顒

明年舉酒拜公壽安知不在槐庭中

送鄭惠叔司封江西提舉

君名切斗魁步武上霄極蓬萊羣玉府圖書照奎壁郎
官應列宿寢覺象緯逼胡為作使星炯炯向江國仰奉
鶴髮親版輿映萊服昔日紅蓮池帥垣資婉畫方將散
餘潤連城被膏澤官權與民繇豐儉煩振糴小試活國
手疲氓賴休息便歸侍玉皇拱立香案側富貴殊未已
行行上鸞掖君其妙演綸三能看齊色

次韻胡元川茉莉花

殘暑未盡秋欲來，玉刻萬葉瓊英開。
孤標雅韻一枝足，江上紫翠空成堆。
素娥嘗與明月約，青女細把輕綃裁。
主人好事起時買，買真此地真宜哉。
牆間閨地方丈所，幾年累甃裝層臺。
春花秋卉紛互發，胡葵芍藥參徘徊。
眼明忽見此奇絕，第畜素馨兄事梅。
夜深飛香性幽獨，未許蜂蝶來相陪。
糖甃封餘有閩土，會須掃取添花栽。
吾聞閩山千萬本，人或視此齊蒿萊。
何如航海上天闕。

玉色照映琉璃盃
新涼徙倚看不足
坐見日影敲庭槐
同官登勅局小樓觀雪

去年歲豐登雨暘應時須所欠惟一雪
祈禳遍精廬晚亦粗飄瞥六花舞
空虛雲氣不待簇風伯隨驅除殘春
寒尚深忽見雲模糊撒鹽壓衡茅
晨興粟生膚隨班上廊廟恍若登蓬壺
壑峽宮殿深朱扉黃金鋪百神衛靈
居半天散瓊琚又疑守護嚴寶網絡
明珠參差駕鵞行簪笏皆沾濡退歸
冷局中牕間竹扶疎為思此絕景往

往終年無不應憚凌寒閉門守紅爐為君登危樓深盃
泛醪酥崔巍瞻吳山莽蒼望西湖瓊枝宿饑鷹玉階走
韓盧酒興萬里遠容我歌且呼坐欲斲五言所媿李與
蘇君與工屬聯瀾橋去騎驢

久不作詩喜仲兄遷隣因成長句

宦遊各天涯皇州今鴈行官居半里所相過復相望西
鄰得老屋往來連戶牕水竹占幽勝風雨對一牀十年
短擎燈今夜分餘光兒曹亦可樂洛誦聲洋洋天邊有

白雲隨風正飛揚
相期奉甘旨
萊衣戲親傍
軒冕皆倘
來此意可暫忘
詩成喜可知
且復酬此觴

送林宗丞浙東議幕

劬

先生風骨天與清
孤松野鶴何瘦生
胷中落落筭五經
大篇短章筆縱橫
壯年文場諸老驚
俯仰世故雙鬢星
萬事不理詩自鳴
笑視軒冕秋毫輕
市者爭利朝爭名
著腳往往遭譏評
先生四五官神京
又復歸去鴻冥冥
臺家急賢理不應
況復寮舊離觴傾
先生自喜行此行

祿粟可以號號聲秦望之山高且平卧龍橫亘環州城
鏡湖千頃波不興晉宋遺跡多豪英議幕了無塵務縈
撫物弔古皆闕情我亦久矣懷滄溟旦夕欲乘緹油屏
相望縱復三四程詩筒尚得尋前盟

臨海縣治琴堂

子賤彈琴真是琴我今無絃知琴心使我不得琴中趣
弦以修綆誰知音才術高低不自由單父二子心則侔
後人不得彈琴暇勿以戴星為可羞

送石應之司戶歸剡以室邇人遠為韻

捷徑指終南索價譏少室窮達豈無命踏地胡不實之
人吏海隅所吐百未一夷途澹無營君其有終吉

年來歎離羣磨琢殆無幾資凡學益落駑駘費尺箠羨
君富春秋發軔方自邇驛驢更著鞭洗眼日千里

南明千古秀慶源久益新剡谿照人清況復屈斯人摻
祛不容留椒觴思拜新他年風雪中扁舟倘知津

平生企賢心山川恨悠緬寧知日相見懷抱竟不展樽

酒了無暇離情果深淺室邇猶許疎況今乃真遠

送王仲矜倅興元

蜀道難難于上青天蜀道易于履平地蜀山天險固
自若視難為易在人爾王尊真有四方志叱馭徑行了
無累早登岷峨仕陰城談笑動行千萬里漢中由來說
鷄肋意謂棄之為可惜君今此去良似之更欲遠遊尋
故迹漢都南鄭啟炎圖秦置石牛山徑闢淮陰拜將餘
高臺武伯葬處空松柏大笑出門何慨慷天涯離愁各

盡觴荷君走馬卻送我李侯參語夜未央君方往蹈功名機何止別駕歌王祥先正九年遺愛在更攜故笏訪

甘棠

仲矜象簡乃參政入蜀時所用

巾山

兩鼇鼉屬隨西行勢欲吸盡西江清是誰繚以千丈城
欲去不去豈不靈化為青山鎮東溟首冠宰堵雙崢嶸
安輿從東喜逢迎笑指鼇背同來登春殘雨足綠陰成
山鳥相和聲唧唧自從半山經小亭仰望巨石扶軒楹

千山萬山擁翠屏陰霾歸靜纖雲興翠微下有長江橫
滾滾不盡千古情橫軒俯瞰萬瓦平佳處歷歷堪指名
雪蓬感雲連曲肱蜂房蟻垤棲殘僧扶欄更上三兩層
一覽衆物無遺形徙倚未厭茗椀傾長嘯兩腋清風生
親顏甚怡輪為停我亦色笑喜不勝願我雙親俱遐齡
方瞳鍊顏華髮星如此兩峯相對青

沿檄柯山歸別張特秀

我昔志學年侍親宦西安弟兄遊庠校見君平生歡君

才獨穎出逸駕不可攀
夜牕共檠燈春遊合盃盤
虛堂卧雪嶺傑閣橫雲
檠爛柯上危磴烏巨沿
溪灣是時氣相高辨論
俱瀾翻一別三十年天
街見我冠殿廬看決科
藍袍立清班黃牒墨猶
濕大弨力能彎爾來又
五載短書能幾番茲焉
捧檄來吏牘方拏煩室
邇嘆人遠一朝脫籠樊
滿意縱劇談痛飲到夜
闌十步九太息此事亦
孔艱進哭老先生畫圖
慘青綸特顯顧何爲一
昔成大還回思我伯氏
人琴有餘嘆感今念疇
昔相與涕淚

潛故人悵無幾恍如春夢殘有酒不得飲有琴不成彈
復歸坐冷屋使我凋朱顏我歸不可遲倚門夢連環君
言欲春糧伴我行路難欲去不得去僧房話閒關年各
幾半百後會鬢亦斑何處更有待此心匪石頑羣憂發
孤笑屬聯不當慳氣岸有如君著身簿尉間鹽車復長
鳴會當上天閑摻袪不忍別雨聲為潺潺君有門戶責
慇懃願加餐

次韻沈使君懷浮岡梅花

玉人迴立山谷裏不有使君誰與憐
毋庸高牙煞風景
為著佳句增孤妍
寒溪照影漫千樹
橫笛吹殘又一年
傳聞年後更多發
便須躍馬趨平川

送王木叔推官分韻得錦字

王郎天下士中和自生稟
澹然初無營見者輒斂衽
幕中資婉畫處事極精審
與人如恐傷律已淵冰凜
深恐馬駛興要使鶚食甚
一寸憂國心幾年不甘寢
此意大未酬退靜若已甚
使之行所學庶幾人奠枕
向來孰閒

之未免斯立喋川詠而雲飛賴有東陽沈露章極推轂
分韻句裁錦風流有如許不復歎蹕蹕如君豈蓬蒿人
物妙流品才應奉香火為養謀祿廩與君幸瓜葛心交
今十稔豈惟我惜別行道情苒在紅蓮色何似翠柏風
愈凜願君疏藥裏一意護茵餌棄鼎寶康瓠浮名如拾
潘行矣無多言臨岐且劇飲

彭子復臨海縣齋

乾道癸巳冬此邦我經行鬱攸氣未殄千家真赤城來

訪臨海令瓦礫紛縱橫翹然二尺高問是戒石銘徘徊
重太息更聞愁嘆聲試詢來者誰共言令姓彭我時語
傍人此邑其將興迨予來贅倖客館方暫停夜聞簫鼓
沸廳事先落成起望輪奐美壯觀聳連薨百堵日已作
斧斤喜丁丁層樓度敕書兩廡環中庭久乃遊其間宏
大使我驚位置既深穩斷削仍工精田里不知役纖粟
無輸征安得屋朗朗突兀有寧馨退食不苟處扁榜皆
佳名中虛物自照政平由心平樨柏已可悅況有賢弟

兄小亭真吏隱縣擁高山青琴堂雖增舊此意宜細評
智調天下理夸言笑後生大弦可以急小弦恐弗勝舉
意屬俄頃立言如所營手足民無措吏姦意相乘不如
疎節目示以信與誠施行有次第幽遠無隱情上下始
相應溫和不亮以清子賤意不傳僅許勝戴星彭令蓋得
此所以千里稱此非以政學淵源甚分明行笑解印去
衆心已先傾太守薦之朝一鶚飛青冥傍無虬蟻援日
夜思歸耕我無薦賢柄直書氣填膺安得採詩官取以

徹明廷

送虞仲房赴潼川漕

我來丹丘乘貳車送客往往萬里餘
盛山使君別寢久漢中郡丞今寄書
公指四明喜鄰境典午何知成畫餅
揚旌忽作梓潼行去路六千抑何迴
餘杭名家多俊奇君子輩行尤白眉
雍容音韻足夷曠百家到手無停披
向來郎曹天咫尺引山閩山接商舶
賈胡嘆仰清節高霧中親見越王石
此行叱馭不作難手遮西日又長安

長安日近公應往未放使星臨蜀山不然一行亦不惡
潼川應如錦城樂鄧侯功名凜如在拾遺風采今猶昨
流馬木牛諸葛公飛輓正欲修前功蜀民險遠日凋瘵
撫摩要令畿甸同況公五絕追鼻祖隸古真有兩漢風
歸來富貴固未晚為傳此學川西東

奉口遇雨

七月欲盡八月初天久不雨暑未徂下田焦卷上田槁
愁嘆不止田間夫嘔啞水車日夜響漕河揚塵成坦途

喜見此溪深且廣玄雲忽起西北隅林間槭槭水漚起
兩岸人物歡欲呼未聞滂沛潤龜坼且使萬物聊沾濡
船牕飄灑疎蓬漏客意自適涼襟裾引身東望雲氣薄
未知帝城有此無傳聞今日方奏告便有響應來斯須
人家百萬苦炎燄君王齋禱幾月餘君王齋禱幾月餘
雲師雨師其疾驅

游天台石橋

兩龍爭欲起深壑觸破山骨成修梁滔滔共出一門去

凜凜直落千丈強初疑鞭石跨滄海絕勝乘鵲橫銀潢
要須高躡前峯過往叩山中眞寶坊



攻媿集卷一

欽定四庫全書

集部

攻媿集卷三

詳校官右中允臣薩敏

主事臣呂雲棟覆勘

總校官庶吉士臣倉聖脉

校對官中書臣牛稔文

謄錄監生臣周牧

謄錄監生臣袁繼升

欽定四庫全書

玫瑰集卷二

宋樓鑰撰

古體詩

史少師賜第賞芍藥分韻得木字

帝城有僊山雙徑森萬玉洞戶入深窈突兀見華屋相
君領衆客紅藥想芬馥霜刀妙裁翦臙脂點冰縠枝弱
不勝花翠葉共斜矗向來爭春風桃李媿粗谷百卉紛

何在庭樹擁新綠此花丈人行儼立見幽獨相君戴花
笑和氣俱可掬人言此花勝相君意傾屬誰知心廣大
何物不蒙幅豈以庭中花而肯棄凡木君看擇勝具所
可可追逐自言居閒時情話會親族一花有可觀爛賞
費銀燭此心何揀擇寓意本無欲以此宰天下以此鎮
藩服兒童與走卒人人歌相國有能達此觀春風四時
足

送錢伯同寺丞守嚴陵

嚴陵錢使君丐外得請外府同僚相與飲餞於
錢塘之津某病疹弗得預方得請之初某歎曰
去年送君來今年送君歸君笑曰此節送行詩
也卧病枕上口占

去年送君來今年送君歸君善全去就我獨念別離君
是忠孝家襲紫傳金龜門戶二百年所寄在一夔少年
便老蒼況今更險夷不獨妙言語理窟深莫窺健筆照
手澤典刑從可知向來御祥琴欲把江海麾促名歸舊

班退食方委蛇世事等飄瓦人情嘆然其向非渾金質
百鍊豈不衰浩然賦歸歟潔身而去之為寮曾未幾棄
我忽若遺君既棄我去謫僊復追隨陡去二良友揜袪
重分歧前別易再會後見當何時才具素絕倫涵養日
以滋且為牧嚴陵赤手磨瘡痍歸來應不晚青氈當屬
誰願君厚自愛歲寒尚相期

送楊嗣勲校書守眉山

我生東南陬不識蜀道難觀君眉宇秀想見岷峨山漢

廷射策時連璧照駕班伯氏書萬言逸駕不可攀茲焉
從君游頗得窺一斑僊凡隔弱水接辭良亦艱矧茲萬
里別望望何當還三蘇騎鯨去詞章滿人間豈無後來
者遺珠有餘歎願君效樂全飛章達天闕報國此最急
餘事付等閑宜室行見思朝暮當予環別語敢言詩屬
聯不容慳

送何道夫祕監守潼川

妙齡冠蜀士名聲振王畿晚隨名節來天朝增羽儀我

昔倅丹邱鹿侯掛冠歸羣公俱祖送見公四三詩頗恨
著鞭先自言乞身遲拳拳慕下風直欲夢見之還朝挹
高致氣宇清且竒稱者不容口往往同一詞始見荷傾
倒笑談欲忘疲況當秋風高濫吹叅試闡鼎鬻得一嘗
豹班容管窺叔度真似道莊生信忘機親疎皆不可況
容磷與緇諸生得公來歎曰真吾師叩簾或三請響答
了不疑私謂如此人定應備論思胡為歸興勇抗章氣
不衰鼓盆萬里外抱孫更成悲擁麾東川去無人留孔

幾別懷不自勝別酒聽淋漓他時念老成追風且復西
公能重來否此意非吾私

送趙子直貳卿帥三山

一蹴登從班人胡謂公遲建牙帥七閩人胡為公疑公
今第一流志操古與期雨州有遺愛江西憺霜威重來
長道山批勅兼瑣闥一片憂國心輾轉中夜思正色抗
危言傳誦滿紳綏造膝有啟沃削藁知者誰此心與天
通此意上所知所以名愈尊萬口同一詞進用恐不速

小卻成歎客天語自昭然更欲試望之況彼三山重謀
帥皆衮衣茲行豈細事報政不待期登門恨最晚臭味
忘賤微自慙空惜別不解留孔戢十連終斂惠居中乃
其宜試問行道入但知望公歸

玉版鮮次陸子亢郎中韻

鱗黃不減鯨與鱣迎風鼓鬣噴腥涎漁人不顧浪如山
談笑坐致扁舟前不鉤香餌不得去何用大網相索纒
揮刀紛紜鬻肉骨巨口噉喁誠可憐珍鮓萬甕不論錢

頭顱萬里顏行肩星郎日叅玉版禪頗厭蔬食供盤筵
尚書親作孟宗寄坐覺七箸生春妍卻笑多事張茂先
先怪異說空十年

走筆送僧義沖

一氣行太虛流行紛不齊要之本無物洞然無是疑梵
志有至言還我未生時燒了似不曾亦有毛僧詞沖師
名家子少年習裘箕談吐霏木屑落筆皆珠璣自稱十
年來不復念作詩空門坐枯禪綺語知昨非聞之意已

消談笑到日西習氣終未盡舊編還自携秀句堪供佛
古作力可追愛玩不去手未免成一癡又欲上西湖駐
錫來語離我生墮宿業筆硯置藩籬拔擢困胃腎未老
神已疲幾欲焚故稿要使清夷君詩既不化作何不等
棄之萬事都放下一意控玄機語罷復自笑無使高人
知作詩固無用叅禪亦胡為勸人反自蹈此紙何必揮
不知兩俱忘他時體體歸

催老融墨戲

古人惜墨如惜金老融惜墨如惜命濡毫洗盡始輕拂
意匠經營極深夤人非求似韻自足物已忘形影猶映
地蒸宿霧日未高雨帶寒烟山欲暝中含太古不盡意
筆墨超然絕畦逕畫家安得論三尺身世生緣俱墮甌
人言可望不可親夜半叩門寧復聽三生宿契誰得知
一見未言心已應巖傾千丈雪散空上有清池開錦鏡
意行忽發虎溪笑許作新圖寫幽勝歸尋一紙五十尺
傳以礬膠如練淨自知能事難促迫捲送松窓待清興

筆端膚寸今何如西抹東塗應畧定何當一日快先睹
洗我昏眸十年病

獨旦葦次九五從叔韻

朝菌晦朔雖不知食之實冠東南味庾郎二十有七品
一見流涎驚絕異擲蔬剪韭皆可却味苦應無夏蟲避
大阮哦詩聲未了又索蒸芝今再遺邇來枯枿尚未茁
拳拳頗媿臺無餽倘容小摘寄情親會見長髮見芹意

雪

丙午九月才入冬晦日忽驚雪墮空傳聞都城更復早
萬官入賀明光宮自從開霽更不雨和氣真似青春濃
斗柄插子日丁卯夜煽裂缺鞭雷公從以震霆至三四
驚破蟄戶紛昆蟲寧知玄冥全未究翻手作雲千里同
暗牕初聽灑珠電巽二勝六方施工一日喜見瓦溝積
忍寒待伴炯不融二日三日遂盈尺高潤四海思無窮
古來詩人詠不盡巧思橫出昌黎公少時奮筆不肯已
老矣袖手便踈慵兒曹作戲記昨夢舞狻猊踞金雙瞳

誰人若欲撿詩思更作玉山高數峯移將劉叉兩水柱
暉映愈覺清心胸見之躍躍忽技養起呵凍筆尋詩筒
開門一見天宇濶素蛻百萬飛長空瓊樓玉宇滿妙畧
千林寶樹春玲瓏恨無高臺三百尺從觀萬象凌空濛
固知幻景有變滅一時如入崑閬中僊家俄頃閱塵劫
安知此際非神功勝喜年來米價賤便欲扶犁隨老農
牆頭濁醪走來過相與痛飲歌年豐

少潛兄真率會

畫錦坊中作真率羣從相過無俗物主人就樹折楊梅
醉倒薰風涼拂拂小舟傍城登雉堞坐看白鳥蒼烟沒
須臾撐出洞天去傑閣三層高突兀樽前賦詩貴神速
十分鈍似遼天鵲從他銀漏促殘更要見林間紅日出

送元聲弟赴水陽監鎮

吾翁積德厚九子官其六不幸失二人孤嫠紛在目三
弟尚白丁升沈猶未卜吾人扶門戶叅立如鼎足脫死
憂患餘偏親須水菽阿連先著鞭去去長江曲弱冠承

賞延十載荷衣綠間關困家食才就五斗粟要知官無
卑毫髮當畏肅督耕兩丈圩受輸十萬斛處之誠未易
勉旃直自勗執別動萬感酌酒再三祝吾子素解自涉
世要未熟意行須揆理言輕恐招辱王事究一心言玷
復三復細行累大德陰財損陽祿豈惟贈爾言余亦每
自慙公餘稍有暇更取故書讀行矣更自愛家聲要人

續

伯中弟生朝賦荼蘼

春日足風雨不知艷陽天桃李俱成塵懶上西湖船
春餘忽微和茶蘼發清妍池塘芳草夢況復向阿連中庭
月方午密林澹清烟蒙蒙青羅帳粲粲白玉鈿幽歡久
不講羣從俱謹然銀燭煩高燒妃子浴溫泉花以酒為
名我以杯相傳爛醉不復辭此會期明年

黃巖令鄭仁叔索委羽洞府詩

君不見王君羽化脫尋厄故山至今名落翮又不見烏
程野鶴投髦毛佞臣稱瑞民斯勞何如奉林控鶴凌青

霄蕩然委羽登山椒青衣出入洞方杳紫氣氤氲風尚
飄令君頗似丁令威鶴馭久去雙鳬歸山川良是人民
非一新琳宮還舊規黃山父老歌循良誦君詩句游雲
房更將山名比堅操百歲猶能徹骨芳

青林

郡齋偶休沐驅車出西城依依山水佳瀟瀟松栢聲雪
餘春意動新綠生均泓行行到青林老眼增雙明主人
喜客來倒屣欣逢迎幽居迹甚遐健筆詩方鳴回首幾

年別千里搖心旌相見又睽隔此意猶未平不如造齋
閣四座酒重傾風流陶彭澤骭髀阮步兵看劍引三尺
論文驅六丁綠野秀橫檻山寺傍連甍石罅幽泉溢脚
底輕雲生詩盟忝予會奕道從君爭哦詩谷禽應列炬
林雅驚清歎未云足累句忽已成環坐粲十眉舉酒酬
三英滿壁灑醉墨歸夢含餘清我方媿此集君欲尋前
盟更鞅才縛我秋風為君行

隱清

金匱要略卷二
右軍訪丈君遁迹入深竹我來尋歔歔人亡但空谷靈
龜闔澄潭華宇對我瀑若人今何之尚想舊茅屋吾聞
古君子千載守孤獨楚些不可招懷我愴喬木

送劉晉父監獄

濟南劉夫子生來逢百罹乃翁負長才宦游至京西時
當建炎間寇盜紛不齊轉徙入湘廣一家屢貼危五羊
買海舟萬里向鮎埼舟破投永嘉有如鳥擇棲哀哀老
治中蒙葬山之陞母家在衡陽孤嫠往相依久卧漳濱

疾羈窮命如絲事母以孝聞執喪禮無虧廬墓屏輦茹
至行徹丹墀有詔寵數蕃得官祇奉祠行年六十二霜
髯照龐眉慨然念防墓千里來海涯西山如蓮華古今
冢纍纍況此久宿草蕪穢不復治孝思雖甚切冥漠何
從催行道為興歎智力無所施有僧幾九齡自言記當
時君聞亟叩請東崗指荒墓吾師慕泓公少也從吾師
墓中有版識倉猝不暇碑素棺無石槨灰炭周四圍君
方感斯言鑽穴從旁窺其言皆可驗自此不知疑惟餘

蓋棺木遺骨不堪移斲石表故阡遂塞無窮悲此僧老
而壯斗酒如覆卮與君登山椒下上幾如飛竣事才數
日溘然不可為孝感人益仰真有神相之君曰某不孝
遷奉致失期未得如有失既得滴滴頤嗟我誠寡陋識
君顧已遲一朝來短札謂我從此辭皎皎真白駒安得
施繫維戴侯舊山長叅語心相知謂余當此時頽風激
澆漓世出世間法君方控玄機引証即勝語焉用骫骳
詞衡陽尚寄書當有鴻鴈歸後會渺無日為賦古別離

王成之給事園山堂

烟雨望麗陽前山羅紫翠照水挹南明不與巾子對
竭來登園山一覽萬山會蓮城山固多此地要為最主人
意軒豁物景供曠快山椒湧華屋迴立風埃外一物無
遁形所在皆鮮芥清霜肅天壤佳樹隔闌闌俯仰隨取
舍左右從盼睽門牆尋故步杖屨許從邁恍然至絕頂
更覺宇宙大樽酒屢勸酌棊枰更勝敗秋高月色皎浮
雲了無碍不俟攀僊掌徒手吸溪瀨茲堂極崇敞意若

欠深邃先植易生木徐待松栢兄望遠仍可喜意滿聊
自晦無使山下人或得窺外內但恐趣賜環樹藝或不
逮先生味斯言一笑相領解吾將飭園丁隨我添醫薈
他時逸扶疎吾廬益可愛

游初暘谷及白巖

重來游僊都止欲訪獨峯寧知一峯外佳境無終窮何
處頴川子鏡巖便相逕約我游白巖輕舟借溪翁齋餘
尋宿諾秋霽波溶溶清徹見石底鑱刻驚神工昨登初

賜谷但見石嵌空茲浮懸崖下萬石森竊從上有勝絕
地古語留郭公鬼神謹呵護雷霆掃塵蹤換船到白巖
修篁搖清風縈回進石屋孤竹攢沙蜂洞府僊所閱無
由辨西東扣船過巖下數仞如崇墉石趾平如秋竒怪
遮蒼穹更尋小蓬萊俯瞰馮夷宮篙師進深窈捫蘿捨
枯筇游子非不多無人解從容我因一日留幽尋極山
中秋旻快排蕩日暖如春融歸坐獨峯下石影橫空濛
急呼醺醪清澆此磊砢胸幸有濟勝具未能上金龍為

君揮五絃決臂送飛鴻

夜游獨峯下

峯背正白月舒光峯影橫野萬丈強仰之彌高立卓爾
蔽遮星斗摩穹蒼半秋風露清徹骨望望直欲隨風翔
歸尋玉虛步松徑月輪正湧門中央

送顏希聖尚書守泉南

聖朝寶運開虞唐太平天子垂衣裳恢張治具崇儒良
孰不願依日月光用之則行舍則藏孔門賢德遙相望

朝望方隆位文昌跬步可到中書堂問公擁麾何太忙
公獨三清志益剛俞音一下冥鴻翔行李徑出臨濤翔
爭留公錢動朝行公更偃俯不敢當老成全德真圭璋
溫如春風嚴如霜栢臺裁豸肅朝綱賢關之風士氣揚
大天小天稱公方五年吏姦蓋而彰金華勸講言加詳
明主傾聽談皇王盍膺枋除任贊襄名遂身退天所臧
明哲保身身更康高風可仰不可量泉山壤土接臨漳
建牙千里開封疆老龍負圖寵煌煌何殊衣錦還故鄉

錢子薄宦接王楊曾陪御史臨文場風簾官燭夜未央
劇談獨記聲琅琅茲來誤忝尚書郎始尋故步依門牆
西風津頭望歸艎公不留遠予將兩宮念公未詎忘
公雖遠去如在旁庶幾重來上錢塘夾輔大業恢中邦
倘有重事須平章

陳順之靈壁石硯山

陳順之吏部靈壁石硯山中有雙澗低處為硯
下米元章題云唐弘文館校書李羣玉有詩南

唐李重光故物也蔣教授文會有詩次韻

名畫法書環四壁中有米家真寶石壁峯森聳外澗流
他物雖奇敢爭席舊屬半山老僊人佛印乞之如乞鄰
阿章有力負之走一時攘取成紛綸此石天然非琢磨
是時有水生巖阿至今硯池尚餘潤歲月既久惜不多
幾年徒見士夫說一旦喜看形偃月傍連玉立兩於菟
主人照映冰壺澈陳侯之富可敵國會有寶光驚四塞
呼童吸盡硯中水更為輕翻玩奇刻不堪回首江南李

空唱多愁似春水不如此石千載傳玉砌雕欄等糠粃
寶晉得之真不易身後寧知亦輕棄只今傳玩知幾人
當日瑣窓空自秘端歛爭名南北部勿向雷門揚布鼓
銅臺渴瓦更不須祇合觚稜陰風雨

跋汪季路所藏修禊序

永和歲癸丑羣賢會蘭亭流觴各賦詩風流見丹青右
軍草禊序文采粲日星選文乃見遺至今恨昭明字畫
最得意自言勝平生七傳到永師襲藏過金籙辯才畫

祕重名以徹天庭屢詔不肯獻託言墮戎兵妙選蕭御史微服山陰行譎詭殆萬徑徑取歸神京辯才恍如失何異敕六丁文皇好已甚丁寧殉昭陵當時馮趙輩臨寫賜公卿惟此定武本謂出歐率更採擇獨稱善遂以鑄瑤瓊流傳迨五季皆在御寢扃耶律殘石晉睥睨不知名意必希世寶旣裹載輜輶帝昶既北去棄與朽壤并久乃遇知者龕置太守廳或云政宣間此石歸紹彭又言入內府宣取恐違程焚膏繼晷拓本手不停疊

紙至三四肥瘠遂異形南渡愈難得得者輒相矜我見
十數本對之心欲醒汪侯端明子嗜古自弱齡錦囊荷
傾倒快覩喜失聲帶流及右天往往字不成而此獨全
好護持如有靈尤王號博雅異論誰與評硬黃極摹寫
唐人若無稱贗本滿城南瑣瑣不足呈猶有藝與撫硯
硯近璜珩右軍再三作已覺不稱情心摹且手追安能
效筆精響指固近似形似神不清不如參其意到手隨
縱橫況我筆素拙何由望羣英近亦得舊物庶幾窺典

型此本更高勝著語安敢輕孤風邈難繼悵望冥鴻征

送劉德修少卿潼川漕

清朝重諍臣選取妙一世矯矯劉御史一鶚勝百鷺顧
瞻最有力步武亦嚴毅一生憂國心千古敢言氣氣足
充所學文能行其意遇事輒奮發觸邪無顧忌乘驄行
且止斂手已知避但思補袞闕何暇為身計獨立當雷
霆三進氣彌厲去魯固遲遲出晝豈濡滯上終行其言
羣賢挽挽致將輸向潼川寓直尚書祕風裁仰清峻進

退審難易伊昔聯周行睽違十餘歲來為同舍郎愈篤
金蘭契洗眼盼騰上寧知攬征袂抗章歎高絕勇退尤知
愧去勿窮日力予環日月冀承君送道鄉硬語吁可畏
母以此自滿當為不止是臨別提斯語少盡交朋誼萬
里句同心吳蜀安有異

次韻李季章監簿泛湖

僊舟共泛滄波去且向蘇公堤下住西風吹就芙蓉城
青鏡開妝兩呈露皇家法常儉素宸心但欲乘商輅

離宮別殿無興作天以西湖共一豫吾儕公退得清賞
酒醖棊枰不知暮深知夕照戀狎鷗又恐昕朝追振鷺
自憐三人鳳凰城歲月黃塵等閑度湖光正欲捲簾看
風色更煩褰幙護孤山不見處士廬司馬空尋蘇小墓
酒乾人醉歡有餘聯騎還趨湧金路歸路健倒渾不知
睡覺燈前裊香霧文人公子真冰玉曾為出遊揮妙句
匆匆借韻僅成章敢託尊前鸚鵡賦

送楊廷秀祕監赴江東漕

平生楊誠齋可仰不可見去年尺一書老忽忽同傳道
山故僊伯再上右文殿蓬萊幾清淺筆力愈雄健獨挾
風雅輶孰敢當白戰一官定一集流傳殆千卷拙工見
大匠有技不敢獻誰持所繫篇徑掣巖下電誦之百寮
上慙汗幾被面公今欲何之江左去乘傳鼻間長栩栩
仕已忘欣怨英英日暮雲薦紳極追戀挽公不得留觴
豆紛祖餞惟應三山高須公和江練君王念疇昔臨遣
尤繾綣公乎遂來歸密侍清閑燕坐寢淮南謀如彼雪

帷見睥睨從容處侵疆歸古汴

送曾無玷寺丞守池陽

我朝衣冠盛名家數三曾南豐暨潁川後起叅溫陵邇
來騾川族駸駸著簪纓春風雁塔中叅差見姓名君才
素穎出健筆泛縱橫江右兩壯縣談笑政已成河陽桃
李花武城弦歌聲入朝八九載去擁池陽旌年家有舊
好一見意氣傾更因劉御史為君寫先銘去年少省郎
君轉為寺丞中都但交謁名紙空毛生惟因候賓廡接膝

傾交情分陰尤可惜翻恐到展迎阿連幸為寮庶幾多
合并寧知成勇退拂袖尋歸程秩滿素簡靜不足煩公
行要當試盤錯操刀新發硎似聞有劇部或已薦長卿
君其少停驂有詔來皇局

劉望之國錄惠示文卷次韻為謝

君聞三峽江湍流下無底吾聞岷峩山聳秀且千里坤
維氣淑靈所產多名士高文既鑑然特立亦卓爾久慕
黃中劉近有貢公喜氣從蜀士問人物定誰比少年負

奇節論事如翻水萬里見張胡義激非氣使賢闕遂為
寮八尺見英偉諸君皆斂避相與推德齒惠我春容篇
句法叅子美再誦平生言作者真近似戰國信徒勞秦
貪不知止漢唐取與守反覆皆造理藩鎮論加詳河朔
分鼎峙詞源既淵深浩博渺無涘從今使諸生教育均
蒙被論議歸正平辭章掃浮靡古人去已遠時毋分彼
此君其挽之回續絃須鳳髓

餞李君亮著作守眉山分韻得翠字

天下大峨山雄秀盤厚地山雖不在眉所在擁空翠矯
矯三蘇公挹此淑靈氣文章垂日星照映蓋一世李侯
起廣漢射策叩丹陛裒然出羣英東南藹名字來上著
作庭行入甘泉侍胡為把一麾西歸尋藥市吾聞此州
俗秉法更陳義厚德坐鎮之近古翻易治君家義槩堂
活人百萬計老親懷故山色養謹承志還家萬里餘赴
鎮夕可至不作題柱驕豈有畫繡意班班老萊衣人間
真樂事忠孝兩無心出處固一致他日上思君命駕當

不俟此別諒非久毋庸掾征袂

送張定叟尚書鎮襄陽

武部尚書張公鎮襄陽士夫莫不惜其去昔韓
昌黎送鄭尚書詩韻必以來字祝使成政而來
歸疾去而願歸蓋人之至情也而公自受隆委
謂邊事非可趣辦願加久任庶有成績憂國而
不為身謀聞者壯之某嘗陪郎省餞別分韻得
壤字未能措辭繼又隨西蜀諸賢之後始得詳

聞臨遣奏請之言被酒夜歸亟述長韻

公家忠獻公勲名照穹壤南軒傳聖學後進斗山仰尚
書天分高百聞真朗朗日坐四益堂濡染助涵養小出
輒驚世發譽自英蕩兩朝倚才辨三接承睿獎堂堂尹
京手風采漢張敞九街寢桴鼓終朝清訟牘汙流化清
溝鬧市鋤巨駟鈴齋晝無人士友厚吾黨政成化自行
渾笑揮浩穰皇家重閭寄拊髀勞注想頗牧起禁中帝
曰汝其往人多惜公去地位切台兩惟公不擇地引義

猶慨慷諏度更周詢千里若尋文再拜受臨遣因得進
忠謹邊臣固多事備禦當素講要須久其任百弊隨剋
礮願假臣歲月表裏如指掌人材固不乏第一戒欺罔
撲拙勝巧心好佞寧不彊願求忠信士枉植謹誅賞更
須寬譬策奏請應如響上問卿何先安靜最為上上憂
襄漢間吳楚久遮障公因論形勢衮衮到遜抗是時晉
在洛武昌勢相向是為必爭地南北謹隄防今雖居上
游事與古殊狀狂寇縱欲來無處可傳向況今三埏靜

皇靈方遠暢與蜀相倚角國勢自爭壯尚期效尺寸才
陳意非廣忠肝氣凜凜秋旻足排蕩上喜憂顧寬趣行
開玉帳捐金示優寵諭賜煩上相惟公最得士離別俱
惘惘薦紳紛祖餞直欲傾家釀賦詩寫胸臆一一成技
養家聲與國事負荷有餘量邊頭十萬兵公臨如挾纊
吾聞胡運窮羣酋欲爭長不戢將自焚前轍有狂煬當
為不可勝有和謹毋倡千載羊叔子制敵恢天網行將
友斯人山川固無恙備成撫機動應煩護諸將功高歸

未晚會見登弼亮他時名父子繼踵凌烟像

送鄭惠叔尚書守建寧

十五年前送別詩道山持節向江西今年又見送公別
大天擁麾鎮閩越向來惜別固已深今日撻袪尤動心
尚書自是第一人氣義相許披胸襟南宮平表平明入
列辟傳聞俱聳立壽皇聖孝冠百王三復高文天為泣
擢處螭坳寵數新果然百日掌絲綸拭圭修聘稱應變
握節不撓威殊鄰直上銀臺尤振職李藩氣槩時批敕

嗣皇銳意新百度筆端真有回天力
星辰聽履冠文昌
急流勇退驚朝行望之正欲試馮翊
長儒寧肯薄淮陽
孤拙自憐銷壯志
三入修門空負媿薦人不進終不已
獨賴當時言有味
公在猶歎一居州
公去無人為王留
公乎行歸佐天子
肯休管晏卑微休

送蘇壽甫少卿赴潼川漕

老坡送江直入海君今歸尋江之源外
臺去鄉若不遠
為持使節臨潼川
君家家世四海聞
單于一問驚胡塵

歸來便合上清禁胡為日念橫峨岷賢哉羣從傳家風
夕郎名節世所宗諸卿亦復載清德況君又似尚書公
壽皇念舊久更深聖明親擢傳王音君歸寧能及黠突
定應名驛來追尋清獻入蜀携一龜君今數鶴同載歸
他時未免蕙帳怨人在西清鶴自飛

分韻送孫從之司業使湖南得千字

夫君靜而敏十人已則千讀破萬卷書操筆思湧泉古
事與今事一一探本源蚤蜚場屋聲作吏志益堅竭來

上清班漢庭在在先雍容行必書史館躬繫鉛片言寤
明主立使登諫垣拳拳憂國心傾倒十三篇司成天下
選歸志已浩然赤日送妻子襆被尋豁船諸生慕陽城
欲挽不得專竟持湖南節征袂何翩翩憶昨忝同登于
今三十年朝行喜相會終恨非官聯請益殊未厭匆匆
啟離筵始以長官來來以繡衣還書生素安分豈問卻
與前第惟公輩流自應留日邊德星聚南楚子環當茹
連事體有關繫臨岐欲無言

送王恭甫倉部知洋州

天清無雲秋氣明好風叢桂傳芳聲乃於此時送君行
江空日短難為情蚤從兩川馳大名眉宇瑩徹春壺冰
語輒傾倒心地平大篇小篇韶鈞鳴壽皇一見喜不勝
璧水邊山照羣英潼川題輿遠有聲痛洗鹽筴疲民醒
天子呼來再登瀛典領著作承明庭絕域往陪蘇子卿
馬上談笑胡人驚歸來期君侍西清胡為西去謀專城
士友重歎君不鷹視此進退秋毫輕洋川風物天下稱

文翁流詠人載賡當時猶待羣政成君今未到意已傾
肯哉大扁秋江澄圖史萬卷鷗與盟殘編斷軸恐飄零
數輩裝潢手不停我亦重來預影纓三日不見鄙吝生
況此搯袪將長征欲挽不留鴻冥冥賜環勿憚萬里程
江山多助筆縱橫黼藻王度扶中興

題范寬秋山小景

山高最難圖意足不待大尺楮眇千里長江浸橫翠畫
家雜雲烟懽恍徒意會苟或森三尺便若俗子對此畫

格律嚴興寄獨超邁洗眼映牕明妙處乃不昧流泉見
原委著屋分向背推車度危橋指路向關隘輕舟最渺
茫浦嶼如有待山稜瘦露骨汀洲橫若帶木蒂黃欲脫
秋容儼然在霜餘無片雲厯厯數沙界搜尋因力疲欲
賦無可奈近山才四寸萬象紛紛納芥欲識無窮意聳翠
更天外

江西李君千能能和墨及畫梅艮齋許以三奇
而詩非所長也

游藝無小大要皆知本原後人率意作終當媿前賢老
潘妙對膠法從玉局傳或假季心名空掃千鐙烟補之
貌梅花疎瘦仍清妍折枝映月影真態得之天李君信
雅尚二者將求全諸公競稱許試之乃誠然江西有詩
派皎皎俱成編茲事未易窺屬君尚加鞭

分韻送盧國華福建提刑得華字

盧侯場屋聲天馬騰渥洼殘膏沾後人奇芬吐天葩來
蹈九陌塵去種河陽花向來再去國盛山建高牙平生

長者譽靜篤語不譁古井絕微波璞玉無纖瑕使星照
蜀道惠愛流三巴吏姦賴刮磨民瘼煩搔爬田里誦虛
公兒童知國華白首尚郎潛坐曹如如麻翩翩擁軺車
去去向合沙朝行惜君去與酒相邀遮共登獅子峯巨
石臨唵呀卻來登湖邊野梅訪萌芽老柳掃黃葉枯荷
蟲寒茄基枰戰文楸醉帽欹烏紗倚昔送君行相去萬
里賒荷君遠寄書得得來東嘉一見又成別感念成咨
嗟羨君徑褰帷往戍不待瓜先尋上水船何殊泛仙槎

作粥喜奉姊上冢仍過家此計正未疎所恨成天涯尚
幾或留行船鼓毋庸過

題老融畫牛溪烟雨

暝烟吹雨冥冥雨牛半渡深清京塵久汚巾履頗思歸
濯吾纓

慧元畫寒林七賢

舊有唐人出游圖謂宋之間王維李白高適史
白岑參六人多畫七賢不知第七人為誰或云

是潘趙遙然未見所據病起坐攻媿齋元公忽
作寒林七賢相寄余方夢寐故山見之灑然戲

作數語謝之

羣賢俱詩豪世代不同處安得寒林中
睥睨相語誰歟創妙意臭味無今古
吾聞顧陸輩寓意或如許桃李並芙蓉
雪中蕉葉吐元師師老融淡墨掃風雨
作此寄攻媿歸興渺烟渚舊六今則七
未知果誰與我欲從之遊詎敢廁儔侶
畫我往執鞭欣為李君御

李文綬和所贈老融詩復次韻為謝

鄴侯插架書最多筆力雄奇天所命萬人深中深閉門
理窟搜尋到幽夤我詩無律如山謳形穢豈堪珠玉映
時時歸入夢故山曳杖松間記投瞑因君佳句撩秋思
便欲歸尋舊三徑兼旬足痺不良行況復炎蒸如金甌
夜來一雨洗河漢簷溜涓涓清入廳晨興剝啄誰叩門
乃有同聲喜相應讀之恍若濯清風自覺昏眸怯明鏡
伊余何幸點班行結交往往多名勝夫君平處顧清新

解道澄江如練淨從今我乃得四友不特官梅動詩興
推枕裁詩謝高致扶僂搖毫心靡定舊聞讀檄愈頭風
今賴長篇起衰病

次韻六和塔秀江亭壁間留題

江外叅差列萬山我家深在萬山間好山正不用錢買
但要未老身先開長江比愁終似少江水能回愁不了
扁舟何日過西陵鄮山佳處吾歸老

跋袁起巖所藏修禊亭

張望當時真蹟臨摹所在支分千載但稱合作誰能有
感斯文

定本為世第一此又在定定前今日錦標玉軸向來不
直一錢

送陳君舉舍人東歸

皇天生人物千載非偶然冲和兼萬人始得一美賢夫
君乃其人人一已百千飛黃欲追風況復勤著鞭文陣
蚤奔放氣欲摩青天短褐東海濱名貫斗牛躔聞道更

獨蚤自言若墜淵出登龍虎榜徑上鵷鷺聯中間幾流
落清湘窮汭沿自首始為郎一見意已傳登臨上麟臺
授簡游兔園擢為柱下史遂居紫微垣去天真尺五朝
綱賴扶顛龍樓闕問寢萬口爭進言惟君最湧決螭頭
屢直前危言破人膽三進加勤拳天高聽亦高歸決何
翩翩高風激頽波同列空慚顏君雖未必去一去勝九
遷我欲留孔幾有懷不得專況我自欲去何心挽歸船
嗟我生何為與君幸齊年先後才九日相與同氣然幾

年若契闊班心忽差肩判花同代庖君思如湧泉上房
草數制一房時一篇一篇輒高妙隗始隗余先春秋隱
公傳國史建隆編周官授大旨所得俱未全聚散不可
料餞別滄江邊君將處於陵我耕綿上田君行無疾驅
中途恐傳宣不然遂能別孤帆渺風烟夢魂不可制隨
君墮中川

次韻趙子野石城釣月圖

石城江頭可憐月曾照六朝清夜獵古往今來知幾何

長江衮衮蕭蕭葉
謫僊去後詩盟寒
王孫詩瘦清樂樂
詩情浩蕩坐無奈
扁舟笑把礪溪笑
江平風輕波瑟瑟
宿靄卷空天一色
東風吹句入長安
一卷風流坐中得
初得神意清再讀
胃次平回顧明月
祇如故世上興廢
徒分更想君一葉
方掀舞夜靜水寒
誰與語船頭有酒
且孤斟莫向金陵
重懷古

戍溪道中

寒潮高于埭黃流濯西河人牛俱力壯相與衝流過潮

落勢回禦轉權依丘阿暮靄起平楚陰雲翳寒莎夜分
潮復上櫓聲相擊摩大江渺無津不知身在何餘生一
虛舟兀然聽風波吾親白雲下沉爾方卧疴遠遊非吾
事歸矣母蹉跎

哭表弟汪去偽墓

內弟幼而敏抗志欲決科一行試曹掾吏才猶患多謂
當為時用舌在如命何通籍已難阻入幕終蹉跎我生
依外家侵尋閱義娥視君如同氣竹馬聲相和少長聯

硯席詞場深琢磨相期到晚歲杖履俱婆婆寧知五年
別君隨東逝波憶同戍溪行我馬君乘羸馬驚費十駕
羸俊已倍過重來意慘愴樹擁山嗟嵯嵯嗟君父與兄相
望空山阿宿草埋白壁寒風撼林柯沈吟痛疇昔有淚
如懸河

次韻蔣德要三徑

居山或稱囚得閑乃賦謫我方樂靜退來作三徑客西
山致朝爽膏肓在泉石況當秋空靜萬里看一碧

吳叅議達觀齋

君不見大鵬與鸞鳩自適俱是逍遙遊又不見大椿視
朝菌一修一短終期盡況乎秋毫為大泰山小莫壽殤
子彭為夭漆園老子超衆作立論雖奇定非矯鳬脰從
短鶴脰長蠻觸亦能成戰場譽堯非桀兩置之讀書博
塞俱亡羊世人顛倒名利途躋攀分寸爭鉤銖河伯猶
驚北海若井蛙醯雞何足誅試同萬衆走城市躍馬途
行分賤貴卻登高處望塵中但見紛紛如聚蟻暫高猶

爾況真高神遊八表非矜豪寧能高舉去人世勿以役
役隨滔滔是知達人有大觀蝶夢為周聊自玩翛然無
入不自得處若終身仕成漫吳侯晚到東海濱飽諳世
故無戚欣相逢一笑成莫逆似知我亦個中人

送姜子謙丞於潛

處則有超蓮出則將哦松眉宇無一塵出處皆雍容君
看妙蓮花本出汙泥中兩松痛掃溉下有簿書叢汙絮
無二致喧寂本亦同於潛今畿邑蜀道里通通至今存

古意民風尚醇醲一邑既當問尤宜撫疲瘡藍田文最高後學仰韓公彼言蓋有激昧者但稱工成案漫不省
忝哉豈真聾姜氏太嶽後夷門慕家風教子延名師列
碑多儒宗宮庠既開荒書種慶所鍾換桂雙枝秀益見
筆硯功後生日加勉衣鉢傳無窮君才有餘刃壯行氣
方充功名此推輪勁翮看摩空我歸幸同社棊酒時相
從尊前不忍別吟愁夕陽春我家老揚州五記有遺蹤
向來耕織圖為煩訪溪翁

送從弟叔韶尉東陽

阿連少也爽孤立生氣餒壯年淬詞鋒傾心事鉛槧膠
庠因薰鹽世科終穩占再興蘭桂堂爾祖真不忝況將
尉東白士友尚歆豔惟我愛子深老矣猶不厭固知為
子喜頗亦動吾念贈子當以言苦口當針砭此邑子舊
游厯厯數行店棠陰見郎君遺老喜窺覘其民最服義
情偽靡容掩莫恃彩棒威要使幕巾墊子文多立就詞
采更華瞻吾聞得雋者塞門差反坫前賢最加謹臨用

更重檢他時可待取天庭得錦帙吾家有素風耳目久
濡染毋庸慕豪舉助廉先以儉酒更宜戒平地有深
塹酣暢當有時勿習孟激灑將論母過高斯言卻防玷
立節母務奇躡等恐成僭外物思過分檢身但多欠勿
嫌一尉卑封清尚為儻仕途固嶮巖大要進以漸不須
若求知真知奏應判向來湖海豪四十可收斂寧為處
囊錐莫作露刃劍匆匆撻祛別魚鮮酒方釀刮目待子
歸罔俾吾言驗

[illegible]

攻媿集卷二